

# **Inissianik attartorneq pillugu Inatsisartut peqqussutaata allanngortinneqarneranik Inatsisartut peqqussutaat (Namminersornerullutik Oqartussat kommunillu inissiaataasa attartortittakkat piginneqatigiilluni pigisatulluunniit inissiangortinneqarnerannut atatillugu attartortut pisinnaatitaaffi pillugit maleruagassat, kiisalu attartornermut akigititaasup naatsorsorneqartarnera pillugu maleruagassat allannguutaat)**

## **§ 1.**

Inissianik attartorneq pillugu Inatsisartut peqqussutaanni nr. 5-imi 31. maj 2001-imi inatsisartut peqqussutaatigut nr. 18-ikkut 12. november 2001-ikkut allanngortinneqartumi makku allannguutigitinneqassapput:

### **1. § 4, imm. 1 ima oqaasertaqassaaq:**

"Utaqqisut allattorsimaffiannit § 3-mi taaneqartumit salliutillugit taaneqartutut tulleriinnilerlugit innersuussutigineqassapput:

- 1) Namminersornerullutik Oqartussat kommunilluunniit nutarterinernut isaterinernulluunniit atatillugu inissaqtitsisarnissamik pisariaqartitsinerat naammassiniarlugu inissiat, takuuk § 48,
- 2) attartortunut inigisaminnik piginneqatigiilluni inissiatut pigisatulluunniit inissiatut tiguserusunngitsunut inissiat, takuuk § 7a,
- 3) inissiat siusinnerusukkut inissaqtitsinissamik qularnaveeqqusiisoqarsimancerata naammassineqarnissaanut innersuunneqartussat, takuuk § 39, imm. 3,
- 4) inissiat aapparisap toqukkut qimagaasup sulisunut inissiamik suliffimmut aalajangersimasumut inniminnigaasumik qimatsineranut atatillugu innersuussutigineqartussat, takuuk § 43, imm. 2, aamma
- 5) inissiat aapparisap toqukkut qimagaasup inissiamit innarluutilinnut inissiatut immikkut aaqqissugaallunilu tunniussaasimasumit nuunneranut atatillugu innersuussutigineqartussat, takuuk § 43, imm. 3."

### **2. § 7-ip kingorna una ilanngunneqassaaq:**

"**§ 7a.** Namminersornerullutik Oqartussat kommunilluunniit inissiaataasa ilaanni attartortut attartortitsisumut piginneqatigiilluni pigisassatulluunniit inissiaminnik tigusiniarlutik allakkatigut

kissaateqarpata, attartortitsisup attartoq piginneqatigiilluni pigisassatulluunniit inissiaatitarusunngitsoq, § 4, imm. 1, nr. 2 naapertorlugu inissiap taamaaqataanik neqeroorfqissavaa.

*Imm. 2. Imm. 1 naapertorlugu inissiap taamaaqataanik neqeroorfqinnittussaatitaaneq taamaallaat atuuppoq, attartortup attartornermut isumaqatigiissut malissimappagu, aammalu attartortup inissiamik neqeroorfqineqarnissaminut piumasaqaatinik allanik naammassinnissimappat. Attartortitsisup pissutsit pingaaruteqanngitsut imaluunniit attartortumit isumannaarneqareersut tunngavilersuutigisinnaanngilai."*

**3. § 8** ima oqaasertaqassaaq:

"**§ 8.** Namminersornerullutik Oqartussat kommunillu inissiaataat attartortittakkat najugaqtigiiffinnut aningaasaqarnikkut namminersortunut agguataarneqassapput.

*Imm. 2. Najugaqtigiiffinni ataasiakkaani najugaqartut §§ 9 aamma 10, imm. 3-mi maleruagassat naapertorligit najugaqtigiiffiup ingerlanneqarneranut sunniuteqaqataasinnaatitaapput, tassa najugaqtigiiffimmi najugallit ataatsimiinneranni najugaqtigiiffimmi siulersuisussanik sunniuteqaqataasinnaajumallutik qinersisimappata.*

*Imm. 3. Najugaqtigiiffinnut immikkoortiterineq, najugaqtigiiffinni siulersuisussanik qinersisarneq aamma taakku sulinissaat pillugit maleruagassat Naalakkersuisunit aalajangersarneqassapput."*

**4. § 9** ima oqaasertaqassaaq:

"**§ 9.** Najugaqtigiiffinni tamani ingerlatsinermut missingersuutissatut attartortitsisoq siunnersuusiussaaq attartortitsisumit akuerineqavitsinnagu najugaqtigiiffimmi siulersuisunut saqqummiunneqartussamik, takuuk § 10, imm. 1 aamma 2.

*Imm. 2. Najugaqtigiiffiup siulersuisui ingerlatsinermut missingersuutinut killiliussat iluanni makku pillugit aalajangiisinhaapput:*

- 1) aserfallatsaaliinerit nutarterinerillu suut attartortitsisup najugaqtigiiffimmi suliarisariaqarnerai,
- 2) najugaqtigiiffimmi init ataatsimoorussat ingerlanneqarnerat atorneqartarnerallu aamma
- 3) najugaqtigiiffimmi sunngiffimmi sammisassanik assigisaannillu pilersitsisarnerit.

*Imm. 3. Najugaqtigiiffiup ukiumoortumik naatsorsuutai attartortitsisumit akuersissutigineqavitsinnagit kukkunersiorneqassapput najugaqtigiiffiullu siulersuisuinut akuersissutigisassan-ngorlugit saqqummiunneqassallutik.*

*Imm. 4. Namminersornerullutik Oqartussat kommunillu inissiaataasa attartortittakkat allaffissornikkut aqunneqarnissaat, ilaatigut allaffissornikkut aqutsinermut akileeqataassutit suunissaat kiisalu akileeqataassutinut sullissinernullu akiliutinut, aningaasaliissutit ingerlanneqarnerinut, missingersuuisornermut, naatsorsuinernut kukkunersiuinernullu agguataarneqarneri ilanngullugit."*

**5. § 10** ima oqaasertaqassaaq:

"**§ 10.** Namminersornerullutik Oqartussat kommunillu inissiaataanni attartortittakkani najugaqtigiiffimmi inissianut ineqarnermut akiliutit tamarmiusut sukkulluunniit imatut aalajangersarneqarsimassapput najugaqtigiiffik periarfissillugu aningaasaliissutigisimasanit iluanaarutissatut inissiamik piginnittumut aningaasartuuteqarsinnaannngorlugu, takuuk imm. 4, kiisalu isertitaminit aningaasartuutit ingerlatsinermut attuumassuteqartut, taamatuttaaq akileeqataassutissatut aalajangerneqarsimasut unerartitsinerillu, akilersinnaanngorlugit.

*Imm. 2. Ukumi tullermi najugaqtigiiffinnut ataasiakkaanut ingerlatsinermut missingersuutit attartortitsisumit suliarineqarsimasut akuersissutigineqarsimasullu tunngavigalugit ineqarnermut akiliutit ukiumoortumik aalajangersarneqartassapput. Piumasaqaatit imm. 1-imi taaneqartut naammassinissaannut pisariaqartumik attartornermut akiliutit qaffanneqarsinnaapput qaammatit*

pingasut sioqqullugit attartortunut pineqartunut allakkatigut ilimasaarutigineratigut, ilimasaarutillu imarissavai qaffaanerup naatsorsorneqarneranik, qaffaanermut pissutaasumik aamma qaffaanerup annertussusianik qaammammut koruuninngorlugit taallugit paassisutissat.

*Imm. 3. Najugaqatigiiffiup siulersuisui aalajangiisinnapput najugaqatigiiffimmi naammaginartumik pitsanngorsaanermik nutarterinermillu suliassat sularineqassasut, peqatigitillugu najugaqatigiiffiup siulersuisuisa pisariaqartinneqartumik ineqarnermut akiliutit qaffanneqarnissaat akuerisinnaappagu. Najugaqatigiiffiup siulersuisuisa aalajangiinerat najugaqatigiiffiup ataatsimiinnerani akuersissutigineqassaaq.*

*Imm. 4. Illup sananeqarnermini akiata 1,5 %-ia inissiatillip aningaasaliissutinit iluanaarutigisarpaa, tak. § 11.*

*Imm. 5. Aserfallatsaaliuinissanut pilersaarutaasunut teknikikkullu ikkussukkat nutaanngorsarnissaannut naapertuuttumik toqqortassat pillugit, attartornermut akiliutip naatsorsorneqarnera pillugu kiisalu attartornermut akiliutip iluarsinissaata ilimasaarutigineqarnissa pillugu Naalakkersuisut maleruagassiussapput."*

**6. § 11 ima oqaasertaqassaaq:**

"**§ 11.** Illuutip sananeqarnermini akianut ilaapput sananeqarnerani aningaasartuutit tamarmik tassunga ilaallutik pilersaarusiornera, nakkutilliineq sanaartorfissagissaanerlu. Illup sananeqarnerani akia kvadratmeterimut minnerpaamik 7.000 kr.-eqarpoq.

*Imm. 2. Illumi nutartikkami sananeqarneranut akia nutarterinerup naammassinerani teknikikkut aningaasaqarnikkullu naliliineq tunuliaqtaralugu aalajangersarneqartassaaq, taamaattorli tak. imm. 1.*

*Imm. 3. Illuutini pisiani sananeqarneranni akiusoq kingusinnerusukkut allanngortiterisinnanerit, nutarterisinnaanerit imaluunniit pitsanngorsaasinnaanerit tapiliullugit naatsorsorneqartassaaq, taamaattorli tak. imm. 1 aamma 2. Illuutini tunissutisiatut, kingornussinissamut upternarsaat malillugu pigineqalersuni, pigisamik naammaginartumik akilersillugu tunniussinermi allamilluunniit appartaarnermi akiliutitaqanngitsumik pigineqalersimasuni taamatuttaaq imm. 1 atuutissaaq.*

*Imm. 4. Imm. 1 naapertorlugu illuutip sananeqarneranut aningaasartuutit kvadratmeterimut 7.000 kr.-itut aalajangersarneqarsimappata, illumilu tulliini taagorneqartut ilaannik ataatsimik arlalinnilluunniit amigaateqarpat illumut sananeqarnerani akigitinneqartoq apparinnejqassaaq amigaataasunut tamanut kvadratmeterimut 1.000 kr.-inik, tak. imm. 1:*

- 1) Uffarfik/perusuersartarfik imermik errortortagaq.
- 2) Kiassaatit qitiusumik kiassaateqarfimmit kiassarneqartut/kissarsuut/kiassaatit innaallagissamoortut.
- 3) Innaallagiaq.
- 4) Imeq imermulluunniit tanki.
- 5) Gas innaallagiarieluunniit iganermut atugassaaq.
- 6) Illup ussissaatai, tak. imm. 5.

*Imm. 5. Naqqup, qilaap iikkallu ussissarneranni kifflutissaq 250 mm ataallugu issussusilik atorneqarsimappat nalinga apparinnejqassaaq, takuuq imm. 4, nr. 6. Kifflutissat allat atorneqarsimappata kifflutissat ussissusiat kifflutissanut (mineraluld) naatsorsorneqassapput.*

*Imm. 6. Imm. 2 naapertorlugu teknikikkut aningaasatigullu qanoq naliliisoqassanersoq pillugu Naalakkersuisut malittarisassiussapput."*

**7. § 12 ima oqaasertaqassaaq:**

"**§ 12.** Inissiaqarfinni inunnit namminernit pigineqartuni imaluunniit inissiani inunnit namminernit

pigineqartuni ikinnerpaamik arfinilinnik inissiartalinni, piginnittumit ataatsimit pigineqartuni, ataatsimullu kiassaatilinni, errorsisarfilinni, nalliuottorsiortarfili, najugaqartunut illatalinni allatulluunniit ataatsimoorussanik atortulersugaasuni, attartortut ineqartut sinniisissaannik qinersisinnaatitaapput apeqqutinik tamanik inissiaqarfiup ingerlanneqarneranut pingaarutilinnik attartortitsisumut oqaloqateqarsinnaatitaasunik.

*Imm. 2. Ineqartut sinniisaannik qinersisarneq taakkulu sulinerat pillugu maleruagassat Naalakkersuisunit aalajangersarneqassapput."*

**8. § 16** ima oqaasertaqassaaq:

"**§ 16.** §§ 10-15-imni maleruagassat isumaqatigiissuteqarnikkut attartortumut ajoqutaasumik sanioqqunneqarsinnaanngillat."

**9. § 57,** *imm. 3* ima oqaasertaqassaaq:

*"Imm. 3. Attartortup nammineerluni nuunnermini nalinginnaasumik iluarsaassinissani kissaatigippagu, iluarsaassineq suliarineqassaaq suliarinerani assassinermik ilinniagaqarsimasutut illorsorneqarsinnaasumik pitsaassusilerlugu. Attartornerup taamaatinneqarnera atorunnaarneraluunniit naapertorlugu inissiap qimanneqannginnerani inissiallu misissoriartorneqannginnerani suliaq naammassineqareersimassaaq, tak. § 59."*

**10. § 57,** *imm. 4,* ima oqaasertaqassaaq:

*"Imm. 4. Attartortup nuunnermi nammineerluni nalinginnaasumik iluarsaassisarneranut aamma attartortup tamatumunnga atatillugu aningaasartuutaasa akilerneqartarnerannut Naalakkersuisut maleruagassiussapput."*

## § 2.

Peqqussut 1. juli 2002-mi atuutilerpoq. § 1, nr. 1 aamma nr. 3-8 1. januar 2002-miit atuutilerput.

*Namminersornerullutik Oqartussat, ulloq 21. maj 2002.*

Jonathan Motzfeldt

/

Jørgen Wæver Johansen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat  
Naalakkersuisut